

Ingoa: _____

Rangi: ____/____/____

Tōku Whānau Wehewehe

nā Manu Aute

Kahukura

Ka kī te pāpā ki te tama kua wehe rāua ko tōna māmā. Auahi ana te ao o te tama. Rērere ana ōna whakaaro. Mamae ana ōna whakaaro. He aha rāua ko Māmā i whakarērea ai e Pāpā? Ka nohopuku te tama rāua ko tōna māmā, ahakoa rongo tonu ia i te mamae e kaikini ana i te ngākau o tōna māmā.

Ka noho rāua, ka tangi hotuhotu. Ka maringi ngā roimata o te māmā ki runga ki te kanohi o te tama, ka piri tahi. Ka titiro ake te tama ki a ia, ka kī atu, “Kei te pai, e Mā, kei a tāua te ao.”

Ka whakahoki te māmā, “Kaua koe e pāpōuri, Hāmuera. Āpōpō koe tipu ake ai ki aua āhuatanga hei whakapakari tonu i a koe.”

Nāwai ā, ka kōrero a Hāmuera mō te hoa rangatira hou o tōna pāpā, he wahine ngāwari, he wahine kaha ki te katakata. “He kāinga harikoa tō rāua,” tāna kī.

“Kei wareware koe, he whare katakata anō ko tā tāua,” te kī a tōna māmā. “E Mā, ka tika. Tōku waimarie hoki!” tāna whakahoki.

Engari, kua rangirua ia. E rua ōna māmā i nāiane. Me aha tāna karanga i a tōna māmā kē? Ko Whaea, ko Rāhera, ko Māmā, ko wai rānei?

I tētahi rā kua tae mai tōna pāpā rāua ko Rāhera. Tino koa ana tōna ngākau nā te mea kua hapū a Rāhera. I heke whakamā tonu te kanohi o tōna māmā. Kātahi ka kite ia i tōna kanohi pakari. Engari ka pupū te mana i tōna ngākau, ka kī, “E Mā, kua whai teina au!”